

## UAPUSH MAK UMATSHASHKUK<sup>U</sup>

Etuat Rich

Pepamipatat ek<sup>U</sup> Uapush. Uiapamat auennua akushinua kakua. Akushinua auennua uapameu, uauieshinua kakua. Tshauapatat ek<sup>U</sup>, patutepatat uitshit. Ka-ui utamaitsheua ekue itit anite utshipishkuamit.

— Tan etin ek<sup>U</sup> ? itiku.

— « Tan etin ? » ituekatueu. Minaush tshitshi pipimuten, iteu. Tshika nakatitin takushiniti. Mueu anite mishtikua auen nuapamau, akushiu anite. Mishtakushtashinakushu tshitshue.

— Tshitshue uitshitu ne, nishtesh, itiku. Mate itutaii anite, ek<sup>U</sup> tshe nipaik.

— Eshe, iteu.

Tshatuatamat ek<sup>U</sup>, ek<sup>U</sup> nepaiat nenua kakua ne Umatshashkuk<sup>U</sup>, nepaiat nenua. Katshi nipaikat ekue tshiuetaiat. Piatakuapanit ek<sup>U</sup> ne Uapush.

— Nipa ! iteu. Tshika ashamitin an, tshika pekunitin tshishtenueiani.

Ek<sup>U</sup> nepat tapue, ne Umatshashkuk<sup>U</sup> nipekashu. Katshi piminuapanit ekue muakuet. Nipania nenua ushima.

— Tanite nana tshikakum ? itiku.

— Takushinipangat nekanat tshishteshat, nitashamauat, kassinu nekani tshitamueuat, iteu.

(Uin an mueu, peikukueshu.) Ek<sup>U</sup> apu mitshishuniti kanapua.

**Uapush utiteu amishkua**

Minuat ekue tshitutet, minuat eshpish anite tat. Pepamipatat, shakapiunu nete eishpatat. Tshekuannu tshematenit, uishtinu ! Nanatuakamenua mishtikua. Tshauetishimut ek<sup>u</sup>. Katshi tshiuetishimut, ek<sup>u</sup> tekushipatat anite uitshit. Ka-ui utamaitsheua anite ekue itit anite utshipishkuamit. Ashuapameu nenua, kushteu tshetshi nashaukut.

— Tan etin ek<sup>u</sup> nishtesh ? itiku.

— « Tan etin ? » ituekatueu. Minaush tshitshi pipimuten, iteu. Mitshuap anite tshimateu. Mishtikua nenua nanatuakameuat anite shakaikanit. Mishtakashimapitetshenat, tshitshue makumitakui, tshessinat tshika nipaikunanat, iteu.

— Tshitshue uitshitu, nishtesh, itiku. Amishk<sup>u</sup> an. Mate tshe ituatamin, tshe nipaiaikut.

— Eshe, iteu.

Tshatuatet uiapannit ushima, papamutaieu nenua ua nipaituakushiti tshekuannu, papamuateu, tshatshipataht ek<sup>u</sup>, nete petshitinat tapue. Ek<sup>u</sup> iesset ek<sup>u</sup>. Anite uashkaim<sup>u</sup> nenu ekue tshipauat.

— Ek<sup>u</sup>, iteu, tshe tshishkaiman, tshe utinamishkuein.

— Eshe, itiku nenua Umatshashkukua.

— Tshe utinamishkuein, iteu.

— Eshe, itiku.

Ek<sup>u</sup> ne Umatshashkuk<sup>u</sup> teuashkunamuat nenua amishkua. Tuashkunam<sup>u</sup> ekue shapushaputuepanniti, shapushaputuepaniunua nenua.

— Ma, tan etiht anat ? iteu.

Ek<sup>u</sup> uiapatamuat. Ekue tshituteht tapue.

— Utinamishkue ! iteu.

Ek<sup>u</sup> at uetinamishkueniti, shaputuepannua mani.

— Tan etin an ? iteu.

Kassinu apu taniti shash. Uiapatamuat anite epiniti,  
tuashkunamuenishapani. Uetamishtikuaneuat ekue pakashtueuat nete. Tshauet  
ek<sup>u</sup>.

Ek<sup>u</sup> muieshtatat ushima, tanite nipaieu. « Ninipaiau », itenimeu. Ekue  
kutapaniuniti niate. Ek<sup>u</sup> nete nenatauat nenua amishkua, nipaieu anite nipit ne  
Umatshashkuk<sup>u</sup>. Ek<sup>u</sup> uetapanikashut, ekue utapanikashut. Katshi utapanikashut,  
ekue tshiuetafet ek<sup>u</sup> utamishkuma. Katshi tshiuetafet nenua utamishkuma, ek<sup>u</sup>  
iteu :

— Nishtesh, peta ma anite ishkuteu. Nui kutuenikatuauat nitamishkumat.  
Uetshipitat.

— Uuu, uuu, iteu, nasht tshitakuinaua. Tshitshitshipishin anite  
ka utamuin.

— Aaa, iteu. « Nipashkamikuat », tshipa itauat.

Patukaiat ek<sup>u</sup> ushima, pituteueshpimitameu utamishkuminua.

Ek<sup>u</sup> peminuet ek<sup>u</sup> nenua amishkua.

— Nipa ! iteu nenua ushima.

Ek<sup>u</sup> nepekashuniti nenua ushima tapue. Katshi tshishtenuet, matshishut  
ek<sup>u</sup>, tshekat tshetamuat nenua amishkua, kutuasht itashinua.

— Ashami ek<sup>u</sup> ! itiku.

— Eka pitama, iteu. Tshi mitshishuiani, patush tshe mitshishuin.

— Mauat, itiku, ashami ! Nika uitamuau nishtesh eka ua ashamin.

— Aaa, mauat, iteu, apu tshika tshi ashamitan. Patush tshi mitshishuiani,  
tshe mitshishuin.

Nekamut ek<sup>u</sup> : « NISH-TE-E-SHA-UA-PU-U-SHA-A-MA-NI-UI-

A-SHA-MIK<sup>u</sup>-NISH-TE-E-SHA-UA-PU-U-SHA », iteu ne Umatshashkuk<sup>u</sup>, « ama nui ashamik<sup>u</sup> Uapush ».

Ek<sup>u</sup> niatauat ne uhu.

— Apu ui ashamaut nenua tshishiminana, iteu.

— Natau, itakanu.

Niatauat ek<sup>u</sup>. Ek<sup>u</sup> pet teueuniti nenua uhua anite utashtuaikanit, shieshaskupaniut niate ne Uapush.

— Eku mitshishu ma ! iteu.

Ek<sup>u</sup> matshishut tapue. Ek<sup>u</sup> etat mani :

— Ekuan ek<sup>u</sup>, tshe tshitamut ek<sup>u</sup> !

Apu tshi natat, tanite kushteu nenua uhua, akushinua anite tanite. Ek<sup>u</sup> iteu :

— Tshe tshitamut ek<sup>u</sup>, ekuan !

Ek<sup>u</sup> tshatapamikut mani uhua, kau niate patapipaniu mani.

Ekue mitshishut ek<sup>u</sup>.

— Shash, shash nitepishkun, iteu ne Umatshashkuk<sup>u</sup>.

Katshi mitshishut tapue, ek<sup>u</sup> nekataukuht nenua uhua.

— Ka-tshitshitamuaua an ! iteu.

Ekue iapit nakataukut.

## **Uapush utiteu musha**

Minuat pepamipatat, pepamipatat minuat. Eukuannu uiapatat musha.

Tshauapatat ek<sup>u</sup>. Pitutetishimu uitshit. Ka-aieshkunamua mishtikunu ekue itit anite utshipishkuamit katshi pitutepatat.

— Minaush, iteu, tshitshi pipimuten. Nuapatau anite auen, mishtamatshishkam<sup>u</sup>.

— Tan eshinatikushit ? itiku.

— Tassikanashteu an, iteu.

— Mishta-uitshitu an tshitshue, nishtesh, itiku. Mush an ishinikatakanu.

Ninipaiati ne mani. Mate, utashamikui napatekat,

ek<sup>u</sup> tshe natak<sup>u</sup>. Nika nashauau, itiku.

— Eshe, iteu.

— Nika nashauau, itiku.

Ek<sup>u</sup> tapue tshatuatamat ushima.

— Tshe pet mitimein meshkanau, itiku.

Ek<sup>u</sup> tapue niashauat ne, ekue atimat ekue nipaia nete nenua musha ne Umatshashkuk<sup>u</sup>. Katshi nipaia ekue manishtikuaneshuat. Nete tshe ututeniti ushtesha ekute anite etashtat nenu ushtikuanim. Shiakashkuaik Uapush. Auennua nenua petashtamapinua, musha ! Itashtanua anite ushtikuannu. Kueshtat ek<sup>u</sup>, tshauepaniut. Minuat

nete kueshte uet shakashkuaik. Ekute anite etashtat ne. Uapititanua nenua upana.

— Nishtesh, petute ek<sup>u</sup>, itiku.

Niatat tapue. Mishta-uauitshinam<sup>u</sup> nenu etashtenit tshekuannu, musha tanite uapititanua upana, ek<sup>u</sup> tshitshue shauenit.

— Nenua mitshi nishtesh, itiku, mishta-uikana nenua matshinanukau.

Ek<sup>u</sup> matshit tapue. Nasht tshitau nenua upana. Tshaueht ek<sup>u</sup>.

Katshi takushiniht ek<sup>u</sup> iakushit. Akushu ne Uapush, putupanu nenu, putushkaku nenua upana.

— Tshitshue nitakushin, iteu. Aiatshitak ne nimanitum.

— Eshe, tanite usham tshui mimitshishun mani, tshipa tshi a eka akushin ? itiku nenua Umatshashkukua.

Apu minekash tapue ek<sup>u</sup> piakumut. Pakumutueu nenua umishkumima.  
Umishkumimishapan anite atamit. Ek<sup>u</sup> mishkut  
apishish matshishut katshi papaniat nenua umanituma.

Eukuan eshkuaiatshimakanit.